

江蘇省立蘇州圖書館
吳中文獻小叢書之十八

借
巢
筆
記

借巢筆記序

借巢筆記，爲吳縣沈守之先生祥年所著。先生生於清道光中，卜居吾蘇平橋。丙午秋，嘗應金陵試，咸同間曾佐豫撫陸稼堂掌牋奏，旋輔長白勝保破太平軍於固始。是書所記，皆其耳聞目擊之軼聞瑣事，洪楊之亂，蘇浙名城相繼失陷，生先悉詳其本末，而於蘇城不守，歸咎上下之泄沓，風俗之浮靡，與潘瘦羊先生蘇臺麋鹿記中所論，具有同慨。他如記廣勇之兇悍，江忠烈曹廉使之殉難，均極詳實，堪補史乘所不及。茲將其書中涉於荒誕不經者，稍加芟汰，凡存三十二則，於此亦足覘清季掌故一斑，未可與猥巷瑣談等視之也。民國二十九年八月江蘇省立蘇州圖書館編纂委員會識。

借巢筆記

吳縣沈守之祥年撰

【王仲瞿神課】秀水王仲瞿孝廉。名曇。權奇卓犖。通術數。好談兵。得五雷真訣。能於掌心作霹靂聲。聞者辟易。嘉慶間。教匪不靖。學使吳省蘭以奇材異能薦於朝。爲言者所沮。斥爲異端。不果用。蘇城吳三錫一案未發之先。郡守王公偶以他事請孝廉占六壬課。孝廉大驚失色曰。課象殊惡。郡中將興大獄。當道均恐罹咎。君亦不免奈何。亟問有無解脫法。孝廉復爲推查奇門遁甲。曰。能向東南方暫避月餘。庶免於禍。然君爲首府。豈能他往乎。適松江府屬有緊要命案。郡守力求上憲親自往提。先生曰。君去亦須擇吉。不由城門而出。於城頭設椅。向東南叩首三。卽坐椅縋而下。否則卽去。亦恐追回。仍不得免。郡守一如教。未旬日。闔郡諸生以吳三錫一案株連入獄。承審官均獲嚴譴。惟蘇州知府以出差免議。孝廉之術。可謂神矣。此事孝廉之子名佐號善才親爲余言。

【趙同知】嘉慶初。吳縣知縣甄某。以錢債細故。杖責生員吳三錫。闔郡諸生憤憤不平。訴於上官及學政。轉遭斥革。大獄已成。幾不可解。容廟遣侍郎錢公樞代平恕爲學政。諭以妥爲辦理。錢公到蘇。廉得諸生冤。奏請開復衣巾。僅以馬袁二生不合首先滋事。擬問軍罪。一時撫藩臬及承幹官員。罷斥殆盡。甄知縣發往新疆效力贖罪。方諸生之入獄也。楚北趙某爲總捕同知。備極凌虐。諸生怨之刺骨。後趙罷歸。諸生有在楚北學署閱文兼司書啓者。適趙某欲爲其子夤緣入庠。諸生得其親筆信函。亟告學使。備述

趙某之惡。不奏則某將以信出首。學使不得已。據情入告。得旨趙某著處斬。事載學政全書。

【入學廣額】學校爲進身之始。取士不妨稍嚴。各省府廳州縣學額。量才定數。多寡不同。然野陋之區。往往名激選拔。而置諸人文淵藪。猶不敵其童子一軍。以其限於疆隅也。亦無術以齊之。吾蘇吳縣一學。國初僅取八名。時以軍餉捐加八名。亦不過十六名耳。有才詣實深。而猶不得與於原額八名者。何義門學士亦以捐貲入學。吾鄉因有真才入學之諺。後因人才日盛。定額二十五名。撥府數名。余於道光中應縣府試。其時吳縣人數尙逾千。一正四覆。四書文。經文。律賦。古賦。五七排雜文。古今體詩。以及書法。無不講求。以故院試獲雋。難如登天。然聞老輩言。謂已不如乾嘉之盛。道咸之際。習尙奢華。獨於延師教子。則吝儉殊甚。考試者日益少。吳縣僅五六百人。而定額如故。文理稍順。已紛紛擷芹去。近以粵逆蔓延。各省捐餉。十餘年來。不可勝數。部議除本身給予獎敘外。每一廳州縣捐至二千兩。准廣文武學額各一名。倘捐數較多。不得浮於原額。准其遞行推廣。如捐至一萬兩。准廣文武永遠定額各一名。以十名爲限。通計各省一歲科試。加廣不下十數萬。如云鼓勵。則本身已給獎矣。不知部臣何所見而輕視學校。以此爲市惠之具也。

【會試中額】本朝取士。各省鄉試均有定額。惟會試則視人數多寡。臨時開單請旨。大省不過二十名。中省不過十餘名。小省不過數名。有偶增減。亦在一二名上下。河南省歷屆會試。取中非十名卽九名。道

光某科會試。部臣照例將前科各省中數開單進呈。宣廟以河南省前科取中十名。而本科人數較少。改爲九名。而原單十字未經塗去。部臣明知其誤。不欲招怨於河南舉子。遂謂欽定十九名。總裁竟照數取中。從此援以爲例矣。

【大錢】咸豐初。粵逆鴟張。命將征剿。餉需匱乏。廷議鑄大錢以裕國用。有當千、當五百、當百、當五十、當十、當五、共六等。當千以紅銅爲之。其大小輕重彷彿如南宋「嘉定元寶」折十錢。其餘皆青銅。分兩以次遞減。至當五。不過較常錢稍大。而鑄工銅質。遠不逮順治、康熙錢之精良。當事者欲多鑄當千。以爲利厚。未幾。不但當千不行。即當五百、百、五十亦罕有用者。京城通用當十錢。外省僅能搭用。即如吾蘇民間賣買。二成當十。八成制錢。譬如一物。本值八十。則非百錢不售。其二成大錢。直同贅疣耳。其餘食物。或輕或小。暗符制錢之數。陽值搭成之價。以免爭競。惟質庫向以制錢典者。今以搭成取贖。大爲虧折。後私鑄者衆。分量轉重於官鑄。而愈形壅塞。乞兒得一廣片則喜。若當十、當五。雖置道中。亦不拾取。蓋一大錢。須輔以四十制錢。然後能用也。六七年間。京師又鑄當十鐵錢。市僧顛倒。銅者轉不行。舊制錢一文不見。憶余丙辰歲正月客彭相國邸第。戲擲狀元籌。以錢爲注。需用制錢數百。一時竟無兌處。時銀價一兩換京錢七八吊。後增至十餘吊。貿易俱用錢票。票重而現錢輕。如銀換現錢。每兩可較時價多一二吊。米麵價每斤二三百文。其實合銀不過數分。河南省鑄小鐵錢。每百搭用六文。米麵翔貴。議者歸咎於鐵錢遂廢。自

鼓鑄之法紛更。各省開鑪設局。虛糜帑項。不數年間。卽歸無用。今惟京師尙用當十大錢。然一出城。則視若糞土矣。

【胡提學】 胡侍郎高望。提學江蘇。防弊甚嚴。點名時。核對面貌冊。稍有不符。立即逐出。有蘇州生年逾四旬。冊填身中面白微鬚。胡審視良久。呼令前曰。爾爲生員。豈不知「微」訓爲「無」。四書微管仲之註甚明。何以有鬚填無鬚。將逐之。生曰。生員有鬚不多。故填微鬚。若如大宗師言。孔子微服過宋。竟不着一絲乎。左右教官。無不匿笑。胡無可如何。遂准入場。又一日。按試某屬。行香講書。故例講書。不過將朱註宣誦一遍。胡嫌其草率。諭某生曰。若講必將書理透澈。不得敷衍了事。適開一頁。係天命之謂性全節。某生請於胡曰。將細講乎。抑僅大意乎。胡曰。我已言過。必須透澈。若何得再瀆。某生曰。然則細講卽一天字。恐一日夜不能竟也。胡亦無可如何。聽其照常宣誦而已。

【童翰林】 道光間。翰林童某。工奔競。爲首輔穆公義子。協揆陳公夫人之喪。童往弔。哀毀若所生。祭文有如喪考妣之語。見者哂鄙。冢宰許公夫人偶病。童令其妻往侍湯藥。朝夕不離。許之子弟多不避面。有嚴東樓拊肩呼嫂之事。而不以爲恥。時上書房需才。輔臣卽以童名薦。某侍御上疏力言童某品行卑污。豈可令輔導青宮。因以前事實之。京師有無名子作爲聯額。上聯集官左云。昔歲入陳。寢苦枕塊。下聯集葩經云。昭茲來許。抱衾與褐。額云。仰惟穆考。上聞雖置不深究。而上書房之選遂中止。童亦從此廢棄矣。

【縣令超升】某公巡撫某省。有縣令某饋獻絕無。屢欲劾之。未果也。會撫軍入覲。蒙詢屬吏中有無政績循良堪膺方面者。撫軍茫無以對。惟屢欲參劾之。令時梗於心。獨能記其姓名。不得已。遂舉以聞。撫軍甫經旋省。而某令已奉旨超擢知府。莫測所由。細訪始知爲撫軍面保。遂往謝。撫公見其銜名。懷惱萬狀。拒不見。且傳言是爾命好。無庸謝也。可見宦海升沉。自有一定。彼督撫亦奚能榮辱我哉。誌之以告世之好爲鑽營者。

【風水】風水之說。余不甚信。然亦有不可誣者。吾蘇科第之盛。爲他省所不及。乾嘉間。鼎甲最盛。嘉慶間辛未科。鼎元雖出湖北。而榜探傳臚皆同城三縣人。城中護龍街長十餘里。以府學爲龍頭。北寺塔爲龍尾。關乎一城風水。相傳此街不宜濬挖。恐傷龍脈也。道光中。貴池桂超萬來守蘇州。朔望於護龍街關廟拈香。見照牆側排列溺桶。污穢不堪。遂於是地掃除潔淨。浚掘雙井。繚以柵欄。以便民汲。自後鄉會試中者寥寥。庚戌會榜竟至脫科。始追咎於浚井傷龍脈之故。紳士有議公呈請官填塞者。因循不果。今則城爲賊據。不知克復後尙有議及此者否。

【風俗】風俗之壞。其起甚微。皆視鄉先生爲轉移。乾嘉以前。閩閩之子。雖擁厚貲。士大夫絕不與通慶弔。憶兒時聞先大母言。我大父中乾隆癸卯鄉試第一。有袖二百金來賀。乞一喜單而不可得。道光間。士人一登科第。擇鄉里之富厚者。廣送硃卷。不問其出身奚若。喜單稱謂。隨意填寫貴眷弟。貴眷姪字樣。甚

且結爲婚姻。服飾起居。一派市井之氣。令人不可嚮邇。軍興以來。若輩以捐餉得列優保。干預公事。自好者。羞與爲伍。寡廉者。轉引爲援。謀利營私。罔顧大局。訖於蘇城失陷而後止。嗚呼。是誰之過歟。

【北人不知枇杷橄欖】彭咏莪相國言。長白賽公尙阿。中州周公祖培奉命赴江蘇查辦事件。往辭潘相國世恩。時交仲夏。相國謂之曰。二公至我吳。正當枇杷大熟。不可不嘗。二公唯唯。比至蘇館。於滄浪亭偶談及之。左右竊聽。以爲星使所嗜。急選上品白沙。盛大盤以獻。二公拈來卽食。皮毛不去。喉中作惡。立時吐出。急命撤去。回京後。潘相國又詢及枇杷味佳否。二公曰。皮澁毛多。莫名其妙。潘相國不覺大笑曰。君殆未經去皮。圖圖吞嚼乎。二公曰。君未教我。如何得知。聞者無不絕倒。又言應會試時。適鄉人餽橄欖至。遂帶入場。以供咀嚼。隔號某孝廉。直隸人也。問是何物。豈火漆爲之。抑係燒磁乎。相國云。此係食物。名爲橄欖。某孝廉不解所謂。相國書橄欖二字示之。亦不識。并告其是名青果。又名諫果。以兩枚贈之。某孝廉食其一。嚙覺良久曰。是何味哉。敢以一枚奉還。

【歇後妙對】吳甦舫宗伯言。一士耳聾。一士闕唇。聾者戲闕唇者曰。我有歇後一聯。爲君誦之。「多聞疑多見。殆於其所不知蓋。」闕唇者曰。某亦有一聯。敢以贈君。「見在天。見在田。雖乎不可拔。潛。」聞者無不絕倒。

【某巡撫】巡撫某。楚人。補邳州舊城司。巧於逢迎。時陶文毅公總制兩江。所著印心石屋詩稿。徧贈屬

吏。某巡檢乞得一部。延吳中名士爲之註釋。并付剞劂。紙張裝訂。無不精妙。獻之。文毅大喜。稱爲詩吏。不數年。薦爲監掣同知。其爲州縣也。文毅過境。供帳備極奢靡。椅衣悉繡陶家故事。如淵明采菊。士行運甓之類。識者轉譏其褻矣。噫。文毅在封疆。卓卓有賢聲。而吮舐者尙復如是。自鄩以下。又何責哉。

【毛太守永柏】彭咏莪相國言。吾鄉毛素存。名永柏。其先世營幕。窮及地師之力。始得一邱。有老人過之。指爲不吉。曰。葬此則毛氏永不發矣。後素存寄籍奉天。由供事議敘佐雜。今已洊擢青州太守。取名永柏。以字音相似。斲之。竟得發跡。亦理之不可解者。

【銅爵磚硯銘】蒙自陸稼堂先生撫河南時。余掌牋奏。諸暨余二鄴掌刑名。二鄴好古。與余爲莫逆交。一日。出硯磚示余。縱八寸。橫四寸。厚二分。金心甚密。云友人得之鄴郡。持以贈渠者。二鄴斷爲銅爵磚。余爲銘刻歸之。銘曰。建安之季。銅臺屹屹。當其構址。意在國色。豈期姻緣。偏結翰墨。於庠吉利。歌舞銷歇。不有賞心。棄同瓦礫。

【某太守】某太守令中州時。初讞囚。書吏呈點名單。計開犯人某某。令一見卽云。傳計開來。書吏稟此非犯人。令大怒云。既非犯人。如何開在上面。爾旣開上。我偏要傳他到案。一時傳爲笑柄。癸丑歲。賊犯懷慶。某亦從戎營中。別立一幟。大書雄黃二字。見者不解。或微詰之。曰。賊係蛇精。我以雄黃二字寓尅制之義。其識之淺鄙。令人噴飯。今且保舉以道員用矣。

【蘇城失陷論略】 薛溪生曰。吾觀於蘇城之陷。而知牛於憂患。死於安樂之說爲益不誣也。蘇人秉性

柔弱。惜字紙。敬五穀。種種善舉。不可殫述。而卒遭大劫者。推原其故。皆由淫佚宴樂所致。方粵逆之陷九江也。距蘇尚千餘里。而警信遙至。遷徙一空。紳富於鄉鎮擇屋安置家眷。起居服食。備極奢靡。婦女豔粧觀花鼓戲。忘爲避亂者然。其後金陵揚州鎮江相繼失守。烽烟逼近。而富貴膏粱之輩。尙以鄉居爲苦。轉皆返城。官紳日議饋賊。有顏姓者爲通線索。定議六十萬。將資往矣。適向軍門追賊至金陵。截其下竄之路。蘇常一帶。暫可無虞。饋賊之議遂止。自癸丑迄庚申。東南籌餉。不下數千萬。民間舖捐房捐丁捐不一而足。不肖之紳與官吏。朋比爲奸。從中漁利。甚且攘爲己功。晉銜挂珠。坐綠呢輿。招搖鄉里。於元妙觀設協濟局。逢期會議。不過縱酒譚談而已。從未有一語及防堵者。噫。燕雀處於炎上。而色不變。不知禍之將及也。邇年蘇城風俗愈蕩。倡伎無論矣。小戶婦女。嬌惰不習鍼繡。始設博局抽頭。繼則公然弄絃索。備牀榻。以取纏頭金。執袴子弟。靡然從風。大街僻巷。無地無之。服尙雪青。婦女一襲衣之費。動輒十數千。風始於妓。而紳戶庶民。無不效之。識者謂雪青之音。近於息清。疑非佳譏。不數年間。繁華之地。蕩爲邱墟。賊卽長驅入城。禍蔓東南。焚掠之慘。千古僅見。蓋自粵逆犯順以來。官吏視疆土若弁髦。然未有一日不守。卽爲賊踞如蘇郡者。向軍門於丁巳歲歿於軍營。代之者和春。仍以張國樑副之。連年圍攻金陵。斷賊餉道。謂可指日收功。而部下廣勇。本與賊同鄉里。聲息相通。雖不卽變。而殺賊不足。擾民有餘。統之者又不得

其人。老師嚙餉。卒致釀成巨害。庚申二月。賊以金陵受困。遂襲圍魏救趙之策。由皖南繞攻杭州。已陷矣。獨滿城未下。適金陵派兵來援。賊卽颺去。由長興一路繞犯宜興。維時大營缺餉。不及一月。兵勇洶洶。將有不測。張國樑亟請和春發餉。靳不與。請之益力。謂不與恐卽有變。和叱之曰。若猶作賊語耶。張蓋由投誠積功至提督。聞之。出而哭曰。事不可爲矣。金陵之賊遂乘間出竄。兵勇不戰皆潰。無一完營。張受傷殞命。和畏罪自盡。制軍何桂清在常州。聞丹陽警。倉皇萬狀。總理糧臺查文經欲爲自全計。力請制軍亟避。兵勇乘機搶奪。亂不可支。賊得混跡於難民逃伍之中。其賊目有紅頂花翎者。有藍頂花翎者。自稱某某。與官吏往還。無以辨之。或謂此類本皆勇目。久與賊通。受僞職矣。卽候補文員中。捐班出身。類不可考。有爲賊使來刺軍情者。大營一潰。其禍遂發。蘇城聞警。惟以逃避爲上策。官眷先行。紳眷繼之。撫軍徐有壬手足無措。署藩蔡映斗好爲大言。謂某在。賊何敢至。然不敢宿衙署。與署知府吳雲如賃民房以備不虞。署臬朱鈞性耽古玩。日惟把弄。以遣愁悶。長洲令李翰文性極佞巧。聞賊信日緊。乞差截留難民。乘舟遁去。遂爲天外冥鴻。陷城十日前。其署已無一人矣。元和令馮樹勳。稍振作。署中尙留一妾。吳令沈偉田鎖拿民船。以備遠遁。其餘閒曹教職。更不足責。吾不知蘇人造何罪孽。聚此一班鄙夫。將城池立予毀棄。豈淫佚宴樂之禍。如此其甚耶。維時賊黨已潛伏蘇城左近。四月初。突有自稱總兵某。往見徐撫。謂帶兵來守城垣。城外民房宜速燬毋緩。徐唯唯。比知其僞。捕之不獲。而燬房之令已下。城外奸細乘機縱火。白晝

肆行搶劫。闔門外上下塘及山塘一帶。烟燄彌天。民不及徙。焚死無算。青盤婁。齊門外。亦皆焦土。葑門外較荒涼。火亦少衰。蓋城未破。而精華已盡矣。自是而逃兵日至。十一日。大股麇集城外。提督張玉良大敗於無錫。馳至蘇城。僞言有兵勇三千。可以助守。徐大喜過望。其實部下已皆從賊。十二日。張令兵勇登陣。將原守城之撫標兵及各團練悉數驅下。余至葑門盤查局。知總董彭某已於先數日載取局中捐費。匿避鄉間。散董不知所措。強余留局辦事。余曰。我謀不用。決裂至斯。尙何爲乎。余前因賊竄杭城。密邇蘇垣。曾有守城芻獻數則。當事以爲緩圖置之。是日徐撫令武弁持弓箭啓放水關。城上兵勇不許。礮石以投民船。聲言輜重豈容攜出。當留爲我用。不待智者而已。知兵勇之禍。卽在目前。有散董傳令團丁夜巡。或大言曰。盤門已攔入賊匪數千。巡何爲者。十三日。黎明。兵勇大開城門。賊衆如蟻。先至各署放火。分路搜括民間財物。或掠人爲之肩荷。余冒險出葑門。遇賊五次。搜索無遺。賊大半操粵音。有身穿號衣。尙係長洲。元和勇丁字樣者。當事蒙賊肘腋。憤憤若斯。天乎人乎。尙稍支時日。如果力竭燭城。尙可解說。今何如乎。向之坐綠呢輿招搖鄉里者。至此亦踉蹌奔竄。婦女之嬌惰者。至此亦毀粧被髮以行。道旁見者。猶能指之曰。此某鉅紳也。此某青樓也。可慨也夫。余避跡海東。傳聞蘇城官員惟撫軍徐有壬。署臬朱鈞殉難。署藩蔡映斗於太倉失陷後。乘賊他竄。據城力守。識者窺其有燃灰之計。署知府吳雲逃至上海。適松江陷後。借夷兵克復。吳雲鉞首功焉。進剿青浦失利。又不知逃往何處。元和令馮樹勳逃至上海。卽在陷蘇。

之日。何其速也。長洲令李翰文渡海依其兄海門同知署中。吳令沈偉田不知下落。張玉良於陷蘇日亦裹紅巾從賊。旋即乘騎遁至杭州。與浙撫王有齡交厚。撥兵以圖後舉。何桂清轉輾遷避。尙擁兵勇數千。到處騷擾。民不能堪。後亦至上海與各逃官相斂一處。聞有旨革職拿問。並不起解。於虜安得據實上聞。盡置極典。以謝東南乎。

【嘉定被陷始末】蘇城既陷。崑山太倉官吏逃避無蹤。賊不折一矢。進而據之。嘉定距太倉才三十餘里。咸豐三年。土匪周立春抗糧踞城。克復後。修築頗堅。鉅富秦氏爲閩邑冠。典舖數十。田園稱是。時賊信日警。有言於秦者曰。君能以一典之貲。招募鄉勇。保衛梓桑。既邀守城之功。復免破家之禍。計無逾於此者。秦拂然曰。吾何能是。遂以珠寶金銀等物鑿園池而匿之。僅攜家口避鄉間。其後典舖俱遭劫掠。園池所匿。亦爲賊發。嘉定人無不痛恨其愚。四月下旬。城中遷徙將罄。千總熊某忽倡議守城。知縣溫綸出庫錢數十萬募勇。益以吳淞兵數百。地本彈丸。城上徧樹旗幟。居然可觀。民間稍稍有遷回者。五月初五日。賊犯嘉定。熊千總帶領兵勇迎擊。兩獲勝仗。賊已退矣。嘉定人酌酒相慶。忽報撫軍薛煥帶勇來嘉。親自助剿。人心益定。薛撫方昂然入城。不意部下廣勇驟變。盡裹紅巾。砍傷鄉勇數名。城中鼎沸。薛撫聞之。先遁。熊千總知事不可爲。斬關與百姓俱出。知縣溫綸亦出走。城遂陷。賊縱火焚大街房屋。翊日卽退。蓋此廣勇久與賊通。以嘉定人曾殺其黨。且與薛撫有仇。薛任蘇州知府時曾殺廣勇陷嘉定。并欲殺薛撫也。雖幸而先遁。

而嘉定人怨恨填膺。謂薛撫不來。吾縣何至失守。於虜是誰之過歟。賊退後。附近土匪進城搜括。越數日。委署知縣陳某帶紹勇至。搶掠更甚。紳董請禁止。陳令謂三日內例不能禁。噫。此何例也。紳董聞然散去。委城於不問。紹勇縱火焚縣署。與陳令俱出。賊探嘉定虛無準備。於六月初五日自松江折回。復據城池。遂爲久遠計。四鄉焚掠。幾無孑遺。惟婁塘鎮有在籍知府陳某。密令地保楊允恭首先投賊。得免於禍。

【廣勇之禍】國家承平日久。武備廢弛。各省額標兵。本敷調撥。而武員餉歸私囊。其威獲人等。各給口

糧一分。以抵工費。所部寥寥老弱而已。自粵匪犯順以來。禍延十餘省。調不足。則募勇以充軍數。勇多而兵寡。不能制勇。於是勇之黨愈衆。勇之勢愈橫。古云尾大不掉。此之謂也。廣勇桀驁性成。視蘇人如魚肉。白晝搶劫。當事畏之如虎。輒左袒之。其勇目半皆通賊。咸豐五年八月。歙血定盟。將殺潘紳爲變。事泄。蘇州知府薛煥帶糧勇皆糧船水手往捕。已爲所敗。適潘紳帶定勇人多漸至。頗能用命。遂轉敗爲勝。捕斬甚多。其

渠魁鄭子崐充廣東會館董事。與官紳素有往還。得不誅。識者謂鄭子崐漏網。異日必圖報復。蘇人無噍類矣。自是廣勇之勢少衰。未幾當事又稍稍招集。元和令馮樹勳。粵人也。選數百名爲親軍。長洲令吳翰文尤而效之。倚爲爪牙。薛煥升江藩。專辦夷務。左右亦多廣勇。噫。是知其不可用而用之者歟。咸豐十年四月十三日。張玉良敗兵爲亂。蘇城已陷。髮逆未至。余目擊持刀殺人搜括財物者。猶著長洲。元和勇丁號衣。卽松。太郡縣相繼失守。半由廣勇內應。當事疊奉嚴旨。不准再用粵人。大張曉諭。是又驅未爲賊者

而皆爲賊矣。不學無術。竟如是哉。其後鄭子崐爲僞後軍主帥。率其勇黨來蘇。淫戮四鄉。慘不可狀。【杭州失守】賊之始攻杭也。在庚申之春。繆南卿觀察名祥所募福勝勇。皆亡命無籍之徒。與民啓釁。地方官繩之以法。勇不服。賊在城下。卽殺繆觀察爲變。賊入城。適金陵大營派張玉良來援。賊見大張字旗。誤爲張國樑至。倉皇竄去。計二月二十七。失陷。三月初三日卽收復。城中未及全擾。然已死亡七萬餘人。辛酉九月。賊傾衆復至。時巡撫爲王有齡。閩縣人。由佐雜洊升是任。辦事頗結實。百計守城。幾閱三月。終於十一月二十八日。以糧盡被陷。議者謂王撫不紮營草橋門外。聯絡水師。以致賊絕我應援。似而不盡然也。余聞之杭人曰。有胡雪巖者。名光本閩閩之流。以捐餉躡躋道員。權子母極工。爲王撫所倚重。於賊未至之先。城中儲備糗糧。悉以委之。胡以時米價尙昂。俟新穀登場。再行籌糴。則其獲利甚鉅。王撫以爲糧備。固有恃無恐矣。而不知其顆粒未實也。迨乎折骸易子。上海急買米前往。皆爲賊阻。不得入城。登吳山一望。糧艘旌旗。排列於黃道關前。固歷歷在目。惜乎望梅未能止渴。市肆草藥。以及牛皮箱籠鞋底。無不吞食。餓斃日數千人。城陷後。賊運糧而入。飢民轉得一飽。聞者爲之酸鼻。向使王撫不用胡雪巖。而別遴幹員。以副斯任。是必糗糧大備。何至失陷城垣。卽陷也而未陷之先。何至餓斃數十萬人。嗚呼。如胡雪巖者。亦何足責哉。古之君子。不用市井小人。蓋料其無遠識。而必至貽誤大局也。是故杭城之失。吾於王撫不能無遺議焉。

【紹興失陷】副都御史王履謙。在籍奉旨督辦團練。遇有公事輒與撫軍王有齡牴牾。副都周長厚。惑於族人號梅溪者從中播弄。竟成水火。方撫軍之爲蘇藩也。梅溪以幕友在蘇。營私舞弊。無所不至。藩司知之。諭屬吏驅逐出境。不許延請。故銜之刺骨。適副都在籍辦團。爲司章奏。遂嗾副都劾撫軍以洩私憤。紹郡爲杭城餉源。毗寧波。號稱富厚。賊久已眈眈。撫軍謂知府得人。方足以勝艱鉅。於是檄調湖州知府廖宗元攝篆紹郡。廖在湖輿情愛戴。且能打仗。殺賊一奉撫命。卽日帶所募炮船數十。蒞紹受事。紹人狂於兵皆通賊。見砲船至。羣情駭疑。然木處團練寥寥。毫無準備。廖嚴催捐輸經費。築城浚濠。爲固守之計。鉅富張氏爲副都戚。抗不交捐。廖繩之以法。怨望益深。乃倡爲謠言知府通賊。其砲船皆賊也。一郡皆驚。未幾賊至。廖飭某弁帶領砲船接仗。衆寡不敵。全軍覆沒。於是謠言又起。某弁已投賊矣。張氏煽動愚民。羣毆廖守。受傷甚重。副都出而解勸始散。賊已逼城下。旣無官兵。又無團練。遂拱手而委之於賊。時爲咸豐十一年十一月初七日也。廖守殉難。副都航海往閩。明年奉旨查辦。遣戍新疆。議者謂猶從未減也。哀哉。大抵紹郡之失。由於官紳不和。而所以不和之故。則一劣幕王梅溪所致。其事甚微。外人不得知也。余聞之紹人避難來溫者。言之甚詳。故誌之。

【王何淵源】何桂清之父封翁某。不詳居里。在滇省充長隨。閩人王某任昆明縣時。用爲司閹。王延師課子。何桂清以司閹之力。亦得附學。兩小無猜。狎昵殊甚。王能歸。爲子捐納鹽大使。分發兩浙。卽今浙撫

王有齡也。何桂清入籍昆明。年未弱冠。連捷入詞林。洊升侍郎。外擢浙撫。封翁迎養在署。王以微秩進謁。陽循屬員之分。陰敘主僕之情。封翁故長厚。不忘所自。必欲王之官階與子相埒而後快。不數年。保升知府。皆何力也。未幾。何擢兩江總督。王亦升雲南糧道。何不欲其遠去。復力疏王有齡才可大用。請留於江南以資襄助。遂由滇遷蘇。升任臬司。王善理財。何弗能及。遇有施行。皆王爲之區劃。王本無奢想。至是亦隱然以督撫自居。屬何力爲保薦。旋升江蘇藩司。藩屬錢糧甲於他省。王嚴檄州縣。催征弗力者立予參撤。適當年穀豐登。解款均能起色。藩庫充盈。爲近年所未有。時蘇撫爲山右趙德輿。王特何援。視趙蔑如也。何欲擠趙而予王。上疏劾之。奉旨切責。大概謂理財是其分內之事。並非奇績。王有齡以佐雜驟躋藩司。不謂不優着。盡心供職。勿存非望。趙與王不合。引疾去。代之者徐有壬。而仍不予王。王氣沮。自分督撫再難覬覦。適庚申二月。杭州被陷。金陵派兵往援。賴蘇餉接濟。賊卽退出。何在常州欣然曰。機會在是。弗可失已。卽日敍疏歸功於王。得旨升浙江巡撫。心實在蘇。而不意其浙也。王赴常申謝。并以言別。何執手歎曰。軍務未已。餉糈浩繁。君去何以教我。王謂金陵指日收復。犒賞須五十萬。若令大營兵勇以五十日領一月之糧。則犒貲不煩他措。何歎爲妙算。豈知軍心之變。卽由此哉。王挾蘇庫銀二十萬赴浙。不一月賊至丹陽。何望風先遁。以致常蘇並陷。疊奉嚴旨革職拿問。而堅臥上洋。並不起解。王連章請貸其罪。并言幼年同學。蒙其提挈之恩。此雖私心偏護。較之忘恩背義者。大相逕庭。故聖上不允。亦不之責也。